

de novembro, relativo ás medidas de protección contra a introducción e difusión no territorio nacional e da Comunidade Económica Europea de organismos nocivos para os vexetais ou produtos vexetais así como a exportación e o tránsito cara a países terceiros; o seu artigo 15.3 faculta o Ministerio de Agricultura, Pesca e Alimentación para aplicar de forma inmediata as medidas que coide oportunas no que concirne ós envíos de vexetais, produtos vexetais ou outros obxectos procedentes de países terceiros que presenten un perigo inminente de introducción dos organismos nocivos incluídos nos anexos I e II do citado real decreto, entre os que se encontran os mencionados anteriormente.

Así mesmo, o artigo 9 da Lei 43/2002, do 20 de novembro, de sanidade vexetal, no seu punto 1 faculta o Ministerio de Agricultura, Pesca e Alimentación a toma-las medidas fitosanitarias de salvagarda que coide oportunas para evita-la introducción en España destes organismos. Por outra parte, e de acordo coa lexislación vixente na Unión Europea, a suspensión establecida nesta orde deixará de producir efectos unha vez que a Comisión Europea adoptase as medidas oportunas en relación co establecido nela.

Na súa virtude, dispoño:

**Artigo único.** *Suspensión da importación e introducción de determinados cítricos.*

Queda suspendida cautelarmente a importación e a introducción no territorio da Península e das Baleares de froitos cítricos frescos orixinarios de Arxentina e Brasil.

**Disposición transitoria única.** *Mercadorías en tránsito.*

Esta orde non afectará as mercadorías que acrediten, de forma que faga fe, que saíron de territorio arxentino ou brasileiro con data anterior á súa entrada en vigor, sen prexuízo do resultado da inspección correspondente.

**Disposición derradeira primeira.** *Título competencial.*

Esta orde dítase ó abeiro do artigo 149.1.10.<sup>a</sup> e 13.<sup>a</sup> da Constitución, que lle atribúe ó Estado a competencia exclusiva sobre comercio exterior e sobre bases e coordinación da planificación xeral da actividade económica, respectivamente.

**Disposición derradeira segunda.** *Entrada en vigor.*

Esta disposición entrará en vigor o mesmo día da súa publicación no «Boletín Oficial del Estado».

Madrid, 12 de novembro de 2003.

ARIAS CAÑETE

## MINISTERIO DE FACENDA

**20832** *ORDE HAC/3154/2003, do 12 de novembro, pola que se establece o prazo de remisión de información para o cálculo da liquidación definitiva da compensación a favor das entidades locais por perda de ingresos derivada da reforma do imposto sobre actividades económicas.* («BOE» 273, do 14-11-2003.)

A Lei 51/2002, do 27 de decembro, de reforma da Lei reguladora das facendas locais, introduciu modifi-

cacións substanciais na configuración do imposto sobre actividades económicas que, en síntese, afectaron a fixación das bonificacións e das exencións, incluíndo nestas a maior parte dos pequenos e medianos negocios; o establecemento, atendendo ó importe neto da cifra de negocios, de coeficientes multiplicadores aplicables sobre as cotas municipais, provinciais e nacionais fixadas nas tarifas do imposto; a definición de coeficientes de situación dos locais, dentro de cada termo municipal, e que veñen substituí-los anteriores coeficientes de poboación e índices de situación.

Por ser obxectivo fundamental da mencionada lei de reforma contribuír de maneira decidida á consecución da suficiencia financeira das entidades locais, a propia norma incluíu unha disposición adicional, a décima, que establecía unha compensación a favor destas entidades polas posibles perdas de ingresos que se derivasen da reforma daquel imposto.

Esta disposición era a plasmación dos acordos adoptados con data do 21 de novembro de 2002 entre o Goberno e a Federación Española de Municipios e Provincias.

Ademais dos principios xerais de cálculo e dos axustes pertinentes, aquela norma establece a potestade do Ministerio de Facenda para fixar prazos preclusivos de remisión da información precisa tanto para o cálculo das entregas á conta como da liquidación definitiva da mencionada compensación.

Considerando que o cálculo dos anticipos á conta se realizará de oficio no ámbito deste ministerio, e que o prazo, para iso, está fixado no punto 4 da propia disposición adicional, esta orde fai referencia exclusiva ó establecemento do prazo para a remisión de información previa á cuantificación definitiva da compensación.

En consecuencia, e en virtude da autorización do punto 5 da disposición adicional décima da Lei 51/2002, do 27 de decembro, de reforma da Lei reguladora das facendas locais, e de acordo co Consello de Estado, dispoño:

**Punto 1.** *Prazos de remisión da información para o cálculo da compensación definitiva.*

O montante definitivo da compensación a favor das entidades locais por perda de ingresos derivada da reforma do imposto sobre actividades económicas a que se refire a disposición adicional décima da Lei 51/2002, do 27 de decembro, de reforma da Lei reguladora das facendas locais, calcularase por instancia das entidades locais afectadas, para o que estas deberán presentar dentro dos dous primeiros meses de 2004 a correspondente solicitude e a documentación adicional precisa que, mediante resolución, estableza a Dirección Xeral de Fondos Comunitarios e Financiamento Territorial.

**Punto 2.** *Delegación.*

Os concellos que teñan encomendada a xestión recatoria do imposto sobre actividades económicas a outra entidade local supramunicipal, sen prexuízo do disposto no artigo anterior, poderán, mediante acordo plenario, delegar nesta última a solicitude da compensación.

**Punto 3.** *Requisitos.*

En todo caso, a solicitude e a documentación adicional deberanse axustar ó contido que, mediante resolución, estableza a Dirección Xeral de Fondos Comunitarios e Financiamento Territorial.

Disposición derradeira primeira. *Vixencia.*

Esta orde terá vixencia exclusiva para a compensación a favor das entidades locais, motivada por perdas de ingresos derivada da reforma do imposto sobre actividades económicas, correspondentes ó ano 2003.

Disposición derradeira segunda. *Entrada en vigor.*

Esta orde entrará en vigor o día seguinte ó da súa publicación no «Boletín Oficial del Estado».

O que lle comunico a V. I. para o seu coñecemento e efectos.

Madrid, 12 de novembro de 2003.

MONTORO ROMERO

Ilmo. Sr. Director Xeral de Fondos Comunitarios e Financiamento Territorial.

## MINISTERIO DE AGRICULTURA, PESCA E ALIMENTACIÓN

**20836** *ORDE APA/3157/2003, do 10 de novembro, pola que se suspende cautelarmente a importación de abellas, colmeas poboadas e lotes de raíñas con ou sen acompañantes, e material apícola biolóxico.* («BOE» 273, do 14-11-2003.)

A Lei 8/2003, do 24 de abril, de sanidade animal, no seu artigo 8 establece que, para previla introducción ou a difusión no territorio nacional de enfermidades dos animais de declaración obrigatoria previstas no Código Zosanitario Internacional da Oficina Internacional de Epizootias ou na normativa nacional ou comunitaria, en especial daquelas de alta difusión, ou para previla extensión de tales enfermidades en caso de existencia de casos sospeitosos ou confirmados ou de grave risco sanitario, a Administración xeral do Estado poderá adoptar, como medida cautelar, a prohibición ou as limitacións da importación en España de animais.

Ante a situación sanitaria do sector apícola nos países terceiros, e para previla entrada en España do pequeno escaravello da colmea (*Aethina tumida*), que provoca a Aethinose, e do ácaro (*Tropilaelaps clareae*), que produce a Tropilaelapose, é necesario adoptar, como medida cautelar, a prohibición de entrada de abellas (*Apis mellifera*), colmeas poboadas, lotes de raíñas con ou sen acompañantes, e material apícola biolóxico, desde países terceiros, ó abeiro do disposto no artigo 30 do Tratado Constitutivo da Comunidade Europea, que indica que se poderán establecer prohibicións ou restricións á importación, exportación ou tránsito por razóns de protección da saúde e vida dos animais, e na normativa antes citada.

Esta prohibición non será de aplicación, non obstante, cando no certificado sanitario se faga constar expresamente que se confirmou, no territorio de orixe, a ausencia dos ditos vectores.

Na elaboración desta disposición foron consultadas as comunidades autónomas e mailo sector.

Na súa virtude, dispoño:

Artigo 1. *Medidas cautelares.*

1. Suspéndese cautelarmente a importación de abellas (*Apis mellifera*), colmeas poboadas, raíñas con ou sen acompañantes, e de material apícola biolóxico que sirva para a explotación dunha abellariza. Para os efectos desta orde, serán de aplicación as definicións contidas no artigo 3 da Lei 8/2003, do 24 de abril, de sanidade animal, e no artigo 2 do Real decreto 209/2002, do 22 de febreiro, polo que se establecen normas de ordenación das explotacións apícolas.

2. O disposto no punto anterior non será de aplicación ás importacións de abellas (*Apis mellifera*), colmeas poboadas, raíñas con ou sen acompañantes, material apícola biolóxico, acompañadas polo certificado sanitario previsto pola Decisión 2000/462/CE, da Comisión, do 12 de xullo de 2000, relativa á certificación sanitaria para as importacións de abellas/colmeas, raíñas e os seus acompañantes en procedencia de países terceiros, sempre que o citado certificado estea completado coa seguinte mención:

«O que asina abaixo, axente oficial da autoridade competente de ..... (nome do país), certifica que as abellas (*Apis mellifera*), colmeas poboadas, raíñas con ou sen acompañantes ou o material apícola biolóxico (1) mencionado(s) son orixinarios e proceden dun territorio en que se confirmou a ausencia do pequeno escaravello da colmea (*Aethina tumida*), que provoca a Aethinose, e do ácaro (*Tropilaelaps clareae*), que produce a Tropilaelapose.

(1) Rísquese o que non proceda.»

Artigo 2. *Réxime sancionador.*

No incumprimento do disposto nesta orde será de aplicación o réxime de infraccións e sancións previsto na Lei 8/2003, do 24 de abril, de sanidade animal, e, en todo o non disposto expresamente nela, no Real decreto 1945/1983, do 22 de xuño, polo que se regulan as infraccións e sancións en materia de defensa do consumidor e da produción agroalimentaria, sen prexuízo das posibles responsabilidades civís, penais ou doutra orde que poidan concorrer.

Artigo 3. *Finalización das medidas.*

As medidas dispostas nesta orde quedarán sen efecto desde o momento en que a Comisión Europea adopte medidas respecto da importación, no territorio da Comunidade, de abellas (*Apis mellifera*), colmeas poboadas, raíñas con ou sen acompañantes, material apícola biolóxico, respecto do pequeno escaravello da colmea (*Aethina tumida*), que provoca a Aethinose, e do ácaro (*Tropilaelaps clareae*), que produce a Tropilaelapose.

Disposición derradeira primeira. *Título competencial.*

Esta orde dítase ó abeiro do previsto no artigo 149.1.16.<sup>a</sup>, polo que se lle atribúe ó Estado a competencia exclusiva en materia de sanidade exterior.

Disposición derradeira segunda. *Entrada en vigor.*

Esta orde entrará en vigor o día seguinte ó da súa publicación no Boletín Oficial del Estado.

Madrid, 10 de novembro de 2003.

ARIAS CAÑETE